

酒

邊

詞

賭棋山莊酒邊詞序

賈生云天下事有可爲長太息者有可爲痛哭者蘇子云嘻笑
怒罵皆成文章雖然太息者吾知其爲太息痛哭者吾知其爲
痛哭嘻笑怒罵者吾知其爲嘻笑怒罵枚如之詞太息耶痛哭
耶嘻笑耶怒罵耶嘻笑之不已而怒罵之怒罵之又不已而太
息之太息之終不已而痛哭之嘻笑怒罵太息痛哭之俱不已
而變爲離奇恂怛纏綿愷惻之語以求容於世使世之人讀之
喜之悅之愛之慕之仍忘其爲嘻笑也怒罵也太息也痛哭也
解此意者可與讀枚如之詞而枚如之詞可不作矣然而天下
之可嘻笑怒罵太息痛哭者自在也而枚如之詞又烏能而不

作侯官黃宗彝序

賭棋山莊酒邊詞自序

余嘗登峻嶺臨谿而坐亂松怒號幽蟲自咽奔泉向東作虎嘯
村歌數聲起於隔岸風徐徐送入余耳余恍然若有感觸歸而
填詞所得漸多或曰其中有天籟焉或曰嘔啞啁哳難爲聽也
道光戊申四月長樂謝章鋌

乙亥重刪一過存其半凡已見聚紅榭雅集詞者亦不錄少
年覲於自見勇於譏刺其他閒情所寄皆非聞道之言多存
不如少存少存不如不存然而曾用心焉欲盡去之其弗忍
矣贅疣黑子面目之病亦面目之真也使子羽遇饒蔑安知
不以爲兩美之合乎七月五日章鋌記於丹芝講院

賭棋山莊酒邊詞題詞

賀新涼

侯官劉家謀

芭川

不斷情根帶數從頭騷愛雅怨總含秋意儻使人寰皆樂境那
討者般文字恐滿紙都無生氣只是天心真叵測算有才如此
非容易偏分外相摧棄 生成異樣愁腸胃汝和儂齏酸蓼苦
一般滋味便是持杯還舞劍怎得淋漓盡致幸有此牢騷堪寄
但自酣嬉原得計怕千秋以後傷心輩又惹出許多淚

百字令

閩縣李應庚

星村

有誰知己只拔刀拍壁呵天斫地宜喚黃金臺下客萬古齊揮

清淚

謂故友張亨甫際亮亨甫有金臺殘淚記

江上衫青月中曲嬾伊媿宮商穉漁

陽三弄滿腔熱血成字 此乃吾友阿連吟殘醉涉筆留餘
事人道蘇辛家法在君自興之所至北固吹簫南皮喝盞更聽
銅琶利嚦聲我也傍牆知否偷記

滿江紅

錢唐高思齊

文樵

一瓣心香休羨那微雲紅杏展長卷抗聲長嘯幾回瓶罄漫道
輕圓兼妥帖可知微妙還清淨笑不才眉樣學夫人聲相應
溫李集人爭稱蘇辛派誰能認這兩般文字一般天性讀罷新
詞如見汝關山此去何由訊嘆滄波明月抱孤絃邀誰聽

大江東去

閩縣劉

勳

贊軒

填宵塊磊把無聊也付偷聲減字幸遇宣城垂法眼謂我狂言

堪喜地下阿兄當時斫劍

先兄芭川詞名斫劍

台熱心香起名山自在千

秋願勿輕棄

可惜骭髀頭顱填詞排遣天莫夢夢醉辜負迨

安空痛哭滿紙長沙之淚且待他年風雲手鑄不愧奇男子效

顰如我描頭畫角而已

鄰著名效顰詞

浣溪沙

宜黃符兆綸

雪樵

剪雪裁雲豔此才離騷別派有餘哀蘇辛抗手見君來

醉倚

三山吹玉笛曉風殘月釣龍臺當年柳七愧俳諧

千年調

侯官宋

謙

已舟

風月久銷沈七百餘年矣攔盡金尊檀板未滿人意空拈紅豆

舊事從頭記冷乾坤悄江山誰崛起

抗聲絕步獨我放如耳

何止偷腔秦柳關響姜史同源異派更欲追溫李莽蘇辛在門
牆猶弟子

百字令

長樂林天齡 錫三

有才如許算古人抗手蘇辛姜史獨把性真抒妙語嚼墨淋漓
漏紙身世飄零朋歡聚散俯仰多悲喜一尊看劍眼中誰是知
己肯說射虎屠龍少年豪氣今日銷磨矣漫向風騷尋墜緒
端合名山位置道上衣塵齋頭蠟淚曾是銷魂地有心人也伯
輿當爲情死

君眞作者只嘲風弄月酒邊餘技甘向宣城低首拜屈指才人
有幾著屐風流賭棋手段都是君家事行藏難定閉門聊作長

計 況乃烽火天涯哀絲豪竹行樂爲佳耳一笑紅塵勞刮目
抱臂狂歌而起無恙青衫有情綠鬢等是憐顛顚讀完詞卷還
君盈把愁淚

金縷曲

閩縣陳適祺 子駒

此是吾家筆自填詞之髯亡後幾人能執倉猝汝從何處得直
關蘇辛壁壁更不蹣跚陵遺跡放出蒼茫萬古恨恣蟠天極地
撫胸臆攫而代真有力 銅琵琶誰當識任紛紛奇才儘有
深情難及但有平生情貫注老手頽唐亦得總不在虛聲徒襲
我見已真行不逮恨斯人竟先吾心獲我欲霸疆應畫

君勿悲歌罷我絕憶梁生

禮堂

風雨聯牀五夜雲黑如盤魑魅笑

拍案狂呼燈炮恨四海人才盡寡一別梁生經半載到今宵始
與君情話梁早說宣城謝天之期汝非聊且莽紅塵自雕龍
虎任呼牛馬不見高冠千百輩鼠嚇鴟同化我好作千秋計
也儻少文章身後事縱紛紛命達胡爲者聰明誤君休怕

掩卷躊躇甚甚漫天饕風虐雪孤花獨孕昂首風雲思起舞俯
首更憂貧病況滿目江山蓬梗痛哭萬言容易耳欲傷時又駭
旁人聽覺積塊口銜鯁感恩知己誰能並有劉君當年巨眼
同心共命一片飛鷺山上月俯仰平生猶認想汝也淒涼怎禁
古有鍾俞今豈罕我爲伊清淚飄難盡友得此豈非幸

逝者如斯耳卧長江怒濤澎湃滿天霞綺擲筆濤頭歸一笑且

被無聊而已我絕叫臂君而喜東鵲蓬山呼好月醉萬花顏色
娥池裏願萬歲樂如此天邊雨又蕭蕭矣黯高吟篝燈無伴
遇心千里窺竹舍中玫瑰好汝可臨風低倚莫苦把牢愁料理
明發江頭同買棹共徐陵劉向雙知己再痛飲豪談起

金縷曲學集中體

侯官鄭守廉

傳灝

短鬢飛蓬葆問枚如致身卿相而今甯早知汝心猶天上月一
片流光皓皓攬多少古今愁抱何日旗亭來畫壁倩雙鬟唱出
君全稿看絕妙人傾倒十年悔走長安道只兩事山林鐘鼎
迄無一可骨肉飄零文字厄判向風塵終老計以後行藏皆左
落拓九哥嗟已死對烏山也合思量我終不似相逢好

金縷曲效集中體

南康謝質卿

蕭奇

那有埋憂地向人間將歌代哭非癡非醉聞嶠煙花燕市月一
任水流雲滯祇博得狂名如沸酒國詩城隨去住放吟魂宇宙
閒遊戲問誰識箇中意青門快把春風袂趁良宵調宮按羽
剪燈無寐似此清才猶不遇愧我塵寰虛寄更羞說烏衣門第
落落吾宗衰歇久望東山事業君其繼請善養浩然氣

滿江紅辛未春夏暢讀枚如酒邊詞十卷胸次頓開步集間韻
以誌佩服

閩鄉張樹葵

聽菴

鼎食鐘鳴間幾日不成寂寞沒來由功名富貴只填溝壑我謂
文章終不朽君家壁壘誰能薄擊青萍大唱酒邊詞燈花落

展長卷連番讀煮酒渾忘濁把肝腸盪洗年來一樂坎塲半
生能鍊骨塵沙四海休睜目彼蒼蒼有意老雄才何嘗錯

金縷曲

維縣張 儻 韻舫

洗盡箏琶耳擅詞場飛揚跋扈古今能幾青眼高歌塵世窄拔
劍時聞斫地肯銷滅元龍才氣老去宣城奇句在問蒼天莽莽
誰知己渾欲把唾壺碎 雄文久樹騷壇幟向尊前縱橫寄與
便超姜史鏗發華鯨無細響樂府何人解是寫一片挈雲心事
斗酒疏肩風雨快溯平生磊落輕餘子浮大白爲君醉

金縷曲

錢塘張景祁 韻梅

醉撥銅琶壯是前身金星夢裏酒星天上吳市簫聲燕市筑讓

此豪情激宕笑賭句旗亭爭長喝月倒行揮水斷算詞壇青兕
眞飛將絃裂帛眾山響沈香舊事空懷想料無緣龍巾拂硯
內家傳唱一掬傷心才子淚瀉入蒲萄綠漲便化作滄溟鯨浪
劍氣橫霜銀燭短任瓊壺擊缺無人賞杯在手莫教放

賭棋山莊集 詞目錄

卷一

長短調二十五闕

卷二

長短調四十一闕

卷三

長短調三十四闕

卷四

長短調五十闕

卷五

長短調六十五闕

卷六

長短調三十九闕

卷七

長短調三十九闕

卷八

長短調一百一十二闕

賭棋山莊集 酒邊詞一

長樂謝章鉞校如

賀新涼

夜與黃肖巖 宗彝 談東漢人甚歡時肖巖將遊永安行期已

迫

僕本狂生耳卻無端長歌當哭時愁時喜二十年來談節義熱
血一腔而已況青眼又逢吾子慷慨相期成底事算英雄總要
輕生死天下事擔當起 男兒聲價甯朱紫說甚麼倚馬雄詞
雕蟲小技元禮林宗如可遇定作千秋知己磨折慣風波由爾
天地生才原有用著精神打點留青史方不愧稱名士

此去君知否算蒼天一番仁愛玉成吾子愈鍊才華真愈出他
日施爲基此願且把離愁束起人世更番成泡幻那古來豪傑
何曾死心中事須料理 凌波一棹風煙裏撇不下相知三載
相思千里亦曉經年原小別怎奈余情難已況未發襦衫利市
潘鬢絲絲看已近問生平歸著如何矣拔長劍斫江水

西施

懷劉芑川

家謀時在甯德

相逢酒市淚痕搓慷慨發狂歌秋風雙臂長劍幾摩挲多事劉
郎苦作傷心語熱血著人多 如今無計相思躲登高望奈愁
何離雲一角慘綠鎖關河引鶴齋頭料想常高卧怕有夢經過

芭川富齋
名目引鶴

歸田樂

前題

執手長亭路想當時伴君西下我把斜陽妬歌也痛哭也醉也
愁也黯黯雲山離離樹如飛轎子去怎曉回頭魂銷處輕波
吹皺風起花如霧行一送者七計日四計程三百八尺藤箋斷
腸句

獻衷心

前題

接雙魚添出血淚絲絲珍重意時念之將空山荷鋪踏月采元

芝無露骨勿見角蘊清奇 狂變恨熱成癡當風一葉受風欺
便奇花綴綵何補枯枝從今後描擁腫付支離

清勿露骨奇無見角也川書中

憶王孫

前題

不合瑤琴終日抱彈一曲一番煩惱幾回挂壁更無聊風過也
聲聲好 劉郎遲汝蓬萊道借妙手煙霞再造伯輿終竟死於
情鋤不盡王孫草

賀新涼

寄李少棠 敬

我本多情者這一絲回環不斷眉頭心下細雨黃昏人去後最是難捱此夜有無限愁魔暗惹勉強拋他他又起似金城鑄就無些罅心中事從何寫當時識字真非也把古人愁懷恨境合同而化甚事干卿卿自苦痛飲讀騷聊且作達語大都是詐三十年華風樣過卻鐙鐙獨抱千金價怎教我肝腸暇

虞美人

一灣流水山如霧迷卻相思路池臺盡處草萋萋人在寒蛩聲裏向風啼孤燈照眼都成淚還恐伊憔悴錦衾繡枕不成情獨倚危樓看月到天明

賀新涼

閩縣李光珞字亦珊仕廣州別駕以家難歿於官妻蔡氏殉之其友仲振履爲之填雙鴛詞院本甚悽惋哀之而作

苦雨淒風夜把這卷長吟一片數行泣下夫婦人間多似蟻似
汝淒涼蓋寡儘辛苦艱難都罷委曲求全還未得況無端貝錦
工嘲罵心中痛誰能寫肝腸寸斷顏凋謝卻猶將綱常二字
時時認者爲婦爲兒無一可此罪千秋難赦說不出淚痕盈把
博得旁觀稱苦節想君心聽此添悲咤真不願如斯也

浣溪沙

一紙魚書遠道來幾番讀罷又重開書中微意要人猜
上說鶯花逢苦雨下言池館長蒼苔不提離別更堪哀

醉春風

默向東風嫁忍把南雲罵人前都說不相思詐詐眼角遲留
心頭恍惚意中牽挂願與鴛鴦化長傍芙蓉罽雙眉照鏡最
分明畫畫畫爾許年華者般人影那番情話

羅敷媚

撩人心緒西風緊愁也添時病也添時獨倚空牀懶起時自
家情緒自家縮神也瞞伊鬼也瞞伊夢裏模糊道著伊

酷相思

夜雨孤燈鳴促織葉簌簌空階積問若此幽芳誰愛惜汝愁也
無人識汝病也無人識卿似芳魂儂似魄不必論形迹算爲

月移山東集 詞一
汝情絲牽百尺一語也千金值一笑也千金值

蘇幕遮

月如鈎波似鏡卮字欄邊隱約雙身並私語最妨人竊聽未說
今生先抱來生訂 想當初思究竟儂喚鸚哥卿效鸚哥應笑
折花枝來作證儂命如花卿與花爲命

八聲甘州

招諸同好飲西園倚醉賦

忽聲聲暮角出江城萬里下長風請君抽寶劍儂搗羯鼓秋氣
橫空無那懷人拚酒天際叫歸鴻我欲從之去南北西東 不
盡悲歡恩怨盡一情所結千語難窮嘆百年世事只是夕陽紅

要爭些男兒聲價莫令人吳下喚阿蒙君聞否三江五嶺鐵騎
倥偬

賀新涼

讀少棠詞有感

無計將天補便媧皇重來鍊石難禁風雨門外愁雲深幾尺匹
馬佳人西去算世上曾無佳處駭女癡男原是福畧聰明便覺
無窮苦還說甚神仙侶這身拚化長亭樹更化爲鷓鴣鷓鴣
離魂叫住十二瓊樓花似繡攜手惟余與汝恨明月又來相妬
情話不防雙影落惹紛紛下界停眸覷他又起浪猜語

憶秦娥

寓齋見月

空庭雪斷雲時漏斷腸月斷腸月南飛鳥鵲一聲淒絕 百年
怎得哀歌歇雙心怎曉愁時節愁時節長途長夜孤燈孤客
空房怯枯腸欲共枯燈絕枯燈絕夢中恍佛見伊嗚咽 寒風
作響窗紗裂寸心暗把愁絲結愁絲結百般珍重當時曾說
賀新涼

枕

眼角眉尖泥漬熒熒淚痕偏大粉痕還細擁被添香枯坐慣拋
向空牀空際想當日金釵墜髻隱出紅腮花幾點快速宵聚首
河山誓留不住真無計 百年好夢今宵繼怎瞞他相思耳熱

相憐目睨交頸鴛鴦雙影重
輾轉中間先敝看微笑秋波欲閉
攬臂驚郎消瘦甚緊香肩不與橫
肱替長共此便君惠

水調歌頭

贈織女

矯首望天闕數片晚風柔不知織女那樣情話對牽牛便算一
年一日十二萬年之內已得幾千秋如此老夫婦豈有別離愁
雲黯黯山渺渺水悠悠可憐三百里外少婦倚高樓賤子如
今卅歲不解齊眉舉案能穀古稀不大笑看河鼓歸去莫遲留
滿江紅

寄集與端

滋森

杯酒相逢算三載生平知己攜手道多情如汝人間有幾我聽
斯言真欲涕一腔舊恨誰能理請君坐彈鋏爲君歌君其喜
南飛鵲東流水勞勞者滔滔矣問刹那世界英雄誰是罵世爭
先攀阮籍憐才不管輪陳起向當年屈賈說傷心謊而已
珍重之情尙不在區區名士祇今日風聲鶴唳那堪如是千古
功名爭衛霍五言文字輪蘇李棄繻生當日有終軍奇男子
釣龍處高臺毀樂遊曲聲未已看無諸宮闕煙塵四起天地生
春時雨後江山如夢斜陽裏把酒杯憑弔越王墳危欄倚
長亭怨

月

歷多少盈虧時節更向愁人十分皎潔幾度推窗三更坐地難
拋撇私情脈脈暗欲向吳剛說光景未團圓便玉斧難修此缺
飄瞥有南飛歸鳥孤影橫風明滅關山一色想其下有人嗚
咽且長跪細訴嫦娥賜靈藥同居瓊闕他道是偷來恐汝清高
不屑

憶情娥

五鼓不寐月光隱隱上窗隙起挑殘燈潑墨填此

殘更盡一盞明月懸新鏡懸新鏡無人梳洗不如收鏡
離情
一樣遙相證怨山怨水傷春病傷春病溫存非我誰知心性

珍珠簾

七夕會飲有懷芑川肖巖

牽牛花發秋深處數佳期恰向銀河西去
慙却到神仙尙不忘
兒女此際嫦娥應有恨恨難得團圓如汝何苦又織起離愁一
天風雨 當日酒榼詩筒倚爪筵乞巧幾番歌舞含醉拜雙星
結有情儔侶讀具空懸人已往葬關山相思何許河鼓爲寄語
歸來鵲橋留與

賭棋山莊集

酒邊詞一

賭棋山莊集 酒邊詞二

長樂謝章鉞校如

長亭怨

登金山塔院

算三度鷗邊折酒一月垂天萬山窺牖看劍哀歌當年此際同
吾友而今往矣空折得離亭柳柳已綠成陰欲齊上江樓能否
回首那馮夷起舞睽睽雙眸如斗腥臊海氣莫染卻蓬萊八
九問誰是古住黿頭真辜負屠龍妙手何日快澄清爛醉騎鯨
西走

虞美人

遲寄書人不至

離愁欲寫偏無字
況少傳書至遙天
黯淡上黃沙
獨自闌干斷續數歸鴉
想伊不忍將儂罵
耳熱孤燈夜涼風陳陳更無情
吹出故鄉月色向人明

滿江紅

答李星村

應庚

無賴西風把秋氣吹人
這樣我欲向天門一訴
天高無量醉後吟君金縷曲
填胸酒挾愁根上憶騎龍
昨夜看蓬萊狂風浪淒涼地
將花葬蒼茫地將雲放作
一番癡想雄心又壯狗尾甯
爲隨俗計虎頭空負封侯相
那瀟陵醉尉猛相訶亦其當

賀新涼

余來春有甯德之行留別劉筠川 永松

三載稱知己算當年墨莊 筠川別業 一席相逢伊始夏課論文陪驥

尾潮俗無聊而已過八月槐黃了矣恰好九哥燕市至 令兄向

西州破屋投名紙兄及弟交遊起乃攜石鼓山頭履著侵晨

臺江買棹煙波十里東冶黃生 肖巖 時在坐形穢我方自恥卻謂

我才華可喜撥我生平心事熱莽雄情看劍秋風裏知之者程

夫子 程石夫玉英

以後離情起屈英才照盤苜蓿興文邊鄙 芭川司訓甯德 我以前人相

砥礪謝鄭風流未已 吾鄉鄭六亭兼才謝退谷 亦謂我雄心勿

死有弟切磋還汝藉算關情第一今惟此言未既淚如水而

今此景又非矣逼來春我將北去雲山迤邐況復沙溪人已遠

肖巖在沙縣從此賞音誰是最難舍石林齋裏與端佳日春秋須好句

壯詞壇刁斗邀程李星村珍重也健男子筠川有海濱健男子章

更漏子

雨疎疎風索索一片傷心樓閣人影隻燭花單羅衣徹夜寒

斷蟲吟孤雁語添出許多酸楚雲黯淡樹模糊家山認得無

一葉落

飲連蜷閣

眼角覷心頭訴此時只望有風雨遠山滑滑泥卿卿怎能去怎

能去又得幾天住

生查子

垂柳倚雙橋舊是郎來處芳草忽無情綠向雙橋去
不醉病
恹恹細想緣何故小妹尙酣嬉亂把飛紅數

滿江紅

旅宿白鶴嶺

強捉楊花使化作浮萍飄去況生質如斯薄弱風波難據匹馬
騎雲山不斷孤燈夢雨家何處看濃陰海濤帶長天迷鄉樹
青青眼將誰覷錚錚骨將伊妬況茫茫塵土銷魂已屢萬古勞
人甯有盡老天離恨猶如許喚王喬控鶴共飛昇瑤京住

滿江紅

忽發狂歌被酒後其聲欲裂更隻眼看天而笑天方苦熱入夜
英雄君似鼠當秋消瘦吾如蝶問悠悠千古爲誰哀哀豪傑
千金劍摧爲鐵萬金駿徒餘血算身後浮名生前塵劫畢竟些
須留亦好不然半世空磨折但如今事業愧傳人怎堪說
霜天曉角

花朝

一簾春透人近花朝瘦十二畫闌西畔風聲急吹紅豆 苦雨
狂時候隔窗燈火皺獨坐宵深無語偷解下金錢逗

賀新涼

芭川書問近狀並故鄉近事填此代札

不見三年矣便一年幾封魚雁添愁而已訪戴南來君又去如
此緣慳何以愧孤負生平知己打疊千般思細說卻紛紛心下
從何起孤燈夜離愁裏昔君訂囑言凡幾謂千金之軀善保
勿爲情死別後滄桑經屢變安得開懷而喜擬幾度移書報爾
天壤茫茫多恨事算勞生猶是尋常耳欲提筆書又止

昔日同遊子便無聊銷愁詩酒平安差喜第一黃生腸欲斷兩
鬢蕭疎餘幾那老屋三間屢徙弟死家貧身又病况雲山無賴
還千里歸來後仲秋起淒涼歲事殘冬裏看黃昏滿天風雪
何方乞米苦調欲彈彈不出翻盡宮商角徵問究竟移情誰是

我到傷心無可語卻背人搵淚青衫底想今日又行矣

世事茫茫裏發哀歌唾壺擊碎看天而起畫角秋風吹落日海

水揚塵千里那簫管夜深有幾官府催租聲不斷誤幾家紅粉

飄零死樂遊曲猶佳耳近來令弟精詩理忽傍山鄂踰堂築

並招葉子人謂吟臺光祿再惜我無能及此我偏想臺江之李

一世才名差不惡卻看山看水傷知己真可笑無聊矣

星村時從余問

芭川曠平生可笑無聊之至星村滿江紅句也吾鄉光祿吟臺在省城光祿坊先輩許有介紹詩社之處

未見飛鸞水便傳聞春風化雨一門桃李更道昂藏多健骨不

但能文而已我想此君心詎喜十載買絲思補袞卻無端繡幌

稱針黹問始願豈如是況君隔歲雙魚裏曾有言蒼茫獨立

同心者幾竭力支撐纔一二未盡區區便止君聽我別陳一旨
不愧古人君已可更文章價重三都紙如僕者真堪恥
御街行

膽瓶花片因風轉絆幾縷爐煙軟滿庭竹葉傍窻飛無數蟲鳴
孤館月痕如練隔簾人道天近清明暖無情瘦骨無心管訴
往事春光晚銷魂第一是青山山遠人兒尤遠銀燈屢撥欲留
孤影作我宵深伴

浪淘沙

暮雨又霏霏歸鳥南飛欄干拍徧半邊欹瞥見落紅牆角颭幾
縷遊絲消瘦想容肌不耐羅衣羌無言語皺雙眉流水一灣

山一曲有箇人兒

前調

見月

未缺總成光流照他鄉一春花事要隄防七寶闌邊都是暈最
怕風狂 冷露滿霓裳回首蒼茫人兒只會射烏彊畢竟舊恩
忘不得奔後無郎

賀新涼

爲芑川題張亨甫

際亮

九曲泛月圖

慷慨張平子把哀歌提醒一世如今已矣不得見君吾甚恨得
見諒稱知已想寫此無聊而已平日多愁緣底事卻蒼茫託興

思山水更何論畫神理
劉郎愛汝真無比抱山陽千秋舊病
淚痕未止殘墨護持如拱璧紙尾留題有幾但九曲近來何似
蟻賊紛紛爲窟宅聞采茶聲斷虹橋裏看長卷傷心起

卜算子

帶醉著歡衣笑作男兒拜一寸芳心不自由都向秋波賣卜
妹太嬌慙學說相思話忽傍檀郎念妾詩真把人羞壞

摸魚兒

貽故鄉諸同好

廿日來銷魂難數量愁應滿三斗當時一笑吞明月跣足科頭
攜手曾記否是那處旗亭帶醉狂歌走而今難又只孤館孤魂

孤燈孤客孤坐五更後
停雲外曲曲春山如繡故人應有話
舊酒邊偶爾離心起未必雙眉不皺重聚首恐瘦骨無多凝血
皆紅豆枯腸迴九況杜宇聲中一天風雨吹盡舊花柳
點絳脣

網起殘紅蛸蠨也解憐香趣心頭如霧忘卻銷魂句
絕好春光可惜成虛度鶯啼處愁絲千縷恨不纏伊住

虞美人

見紅梅有感

恰如國色春風裏薄醉驕羅綺遠山濃淡染雙眉
忽憶箇人梳洗此花宜粧臺近日平安否吹盡樓頭柳戴花人更比花妍

最苦今宵燒燭對花眠

南鄉子

夜風四號有感於心

海氣撼邊城海若驅風萬里行似訴似吟還似答分明中有深
閨惜別情無柰不成更無賴寒蟲唧唧聲一縷離魂吹欲墜
心驚瘦骨年來分外輕

采桑子

心頭輾轉渾無着纔要畫眉又欲熏衣百樣思量總不宜干
卿甚事偏如許花氣微微日影遲遲瘦到腰肢不自知

蘇幕遮

月深深人悄悄窸窣梁間饑鼠帶聲敲獨夜偏長天未曉恐照
孤眠故撥燈光小末如何終不了來去心頭百樣添煩擾一
片離聲風際裊昨日金籠纔養相思鳥

百字令

清明

春光似箭看鶯嬌蝶嬾清明又到梨樹陰陰聞故鬼如訴如啼
如禱南國家山杜鵑滴血綠遍王孫草滿城苦雨柳條檐際飛
掃卻憶張籍當時酒邊戲語百樣添煩惱寒食西風吹點淚
此際纔爲情好一別六年夜臺無雁幽信何從討孤遊已屢箇
人曾否知道

故友張君任如歿六年矣日余與君泛論及交際
君笑曰清明肯流幾點淚方見好也越一年而君

竟歿三復斯言
能無腹痛耶

摸魚兒

芭川歸自福甯置飲填此奉呈

問千秋知音者幾半生無過劉九相逢一笑都如夢不住傷心
攜手平視久認窗外梅花傲骨經霜有枯燈漸黯喜引鶴山齋
懷藤水榭常共夜深酒 青缸劍孤負長年塵垢解衣拋付層
狗裝魚挂壁惟其便未必能留不朽心想又把光彩銷沉何以
關讓口添衣短後便鐵塞彎弓金川捧檄裹革僕能走

猛見君挑燈一笑目光四射如弩低頭拍案呼而起此際熱腸
難數將我覩謂十載京華衣上皆塵土英雄無主算伴食中書

焚香畫寢安用力如虎 斯言出一痛雄心俱沮雖然我爲君
舞乾坤莽莽知何意監子安能千古君莫苦且濁酒幾杯休負
今宵賭江山如許看海市迷離風花出沒不樂亦何補
惜花陰

送春

他鄉不識春何處忍把春光數春色已闌珊春雨春風滿地飛
春絮 丁甯春趁家山去爲向春閨訴春病那人兒一寸春心
都被春愁據

消息

題芭川小照作挂劍欲拔狀

獨立秋風雙眸如電蕭疎華髮七尺安歸千金自買萬感心頭
發拔難見穎藏還苦蝕真把尊拳惱煞無如何張華去矣光采
幾人能說 君方惆悵我更蒼茫第一情根難割半世狂歌幾
番醉舞斫地皆成血無多瘦骨無端熱淚拚與風塵摧折怎忍
道健兒意氣殺人寸鐵

摸魚兒

望月

莽闌山蒼茫一髮清光無賴如許長生閱盡盈虧恨便做嫦娥
何補君算否自過了今宵幾日還三五吳剛最苦伴妖鬼無靈
癡蟾不偶寂寞共千古 真何意更把桂花錮住秋香不到下

土搔頭醉後鄉心緊數徧瓊樓玉宇將伊訴那碧海青天伊且
愁無侶乘風歸去看淺淺一灣箇儂恍彿露出舊眉嫵

金縷曲

寄少棠

記否蘼葭閣向酒邊行期未問歸期先約又道年來蒙汝愛但
汝愛余真錯竟聽汝他鄉飄泊宇宙雖寬知己少算從今規勸
誰能著況心病涼難藥離亭柳絮風蕭索恨無端送人北去
雲山太惡當日相知嫌不密今日相思方覺汝珍重腰肢瘦削
晏起早眠加餐飯那傷心文字休多作言不盡淚先落
此意濃於酒真令人無窮悲感心頭欲嘔我比杜鵑聲裏坐一

世閒愁不了痛三歲麻衣著後地下飄零慈母線算外家愛我
如君少那知己同吾友謂芑川雄才今日何人有嘆圍棋東南
劫急悲涼國手彈指滄桑還似此何況饑驅奔走只百樣期君
知否未得君書時盼望得一書夢寐添煩擾君與我誰不朽
蝶戀花

題寄內書後

誰解忘情如太上把汝心頭日夕長供養消瘦雙身應一樣羅
衾摸偏天難亮來日姻緣今日長汝看離人夫婦多無恙留
得有餘直穩當果然愛我休惆悵

行香子

亂響風聲亂叫蟲聲更雨聲時重時輕寒陰一尺瘦影三更天
黯黯人悄悄夜清清將寐偏驚欲坐還行寸心兒無自分明
誰堪說恨未解忘情夢昏昏身怯怯淚盈盈

摸魚兒

莽乾坤愁雲萬里悲涼甯獨一我紛紛閣上凌煙畫三十不候
爭可低首坐把天壤許多恨事看人做想來未妥便幾字文章
自誇李杜都是拾餘唾今而後心病休相摧挫頭巾聊且擲
破功名二字尋常耳十載驚心烽火慙飯顆算無策救時只合
長窮餓惜哉此座間如許昂藏欲居何等吾笑秀才懦

水調歌頭

東湖泛月

百歲及時樂君莫苦遲留狂歌把酒聊且散髮弄扁舟只恨嫦娥無賴帶些雲情雨意孤負我雙眸使我感圓缺萬事上心頭
棄短棹揮長劍斫東流東流何限渺渺總是古今愁知否後人笑汝如此江山寂寞橫海不封侯挂席狎波浪努力共千秋
浣溪紗

便是虛文亦感恩相思何況有啼痕教人慰藉反無言
幾字之中千宛轉數行以外半寒暄想伊多說恐銷魂

水調歌頭

招諸同志飲賦呈

四坐勿諠笑聽我酒邊謳文章富貴功業無一可長留幸有杯中物尙是生平實得爛醉復何求爲問酣嬉意能索解人不或仰屋或投閣或登樓無窮苦趣轉瞬白盡世間頭只合逢場作戲一任千秋以後呼馬與呼牛大笑揖君飲君莫覓封侯滿江紅

鍊石媧皇漏一角情天未補看我輩肝腸畧可幾絲分與煙雨飄零哀燕雀風雲變化思龍虎莫悠悠貽累到文章如塵土銅爲行希鄒魯椽爲筆追燕許但未知何術果能千古敢道迂疎堪濟世不妨豁達爲豪語對長風把酒拍紅牙狂飛舞

賭棋山莊集 酒邊詞一終

賭棋山莊集 酒邊詞三

長樂謝章鋌枚如

酷相思

八尺輕舟桃葉渡，載不起離愁去。只怕向碧闌干外，覷蝶兒也雙雙住。燕兒也雙雙住。便是尊前同笑語，總覺無情緒。看一片飛紅啼杜宇。酒醉也瀟瀟，雨酒醒也瀟瀟雨。

滿江紅

塊壘都消，把萬事付之長歎。算便有古稀年壽，將踰一半已苦。巢危能壓燕，那堪家遠，還聞雁。且登樓作賦，以銷憂如王粲。時自喜弄文翰，時自愛加餐飯。將雙雙冷眼，世間偷覷，只爲名

心除未盡更兼醉態來爲患溯知交相勗果如何能無汗

大江東去

樽前慷慨卻一番自喜一番自苦天下英雄君與操碌碌其餘
誰數究竟曹劉至今安在寂寞皆塵土疎狂如我恃何能有千
古只是早歲攻書睥睨一切頗覺人如虎文苑儒林吾豈敢
搖筆頻驚風雨溷跡鶯花寄愁詩酒此意將誰語我無足惜近
來時事如許

酣相思

見蘭有憶

自種幽蘭經二載常獨倚奩邊待便薄怒相看顏亦改晨粧也

教人采晚粧也教人采 客裏依然春似海偏覺無光彩想戴
上雲鬟香幾倍對花也伊如在背花也伊如在

青玉案

和芑川

興酣落筆驚風雨時自謂能千古莫逆於心同起舞忽然晁董
忽然衛霍又忽然燕許 酒邊拔劍雙眸努不信紛紛成畫虎
天看斯人天亦苦半爲情話半爲快論又半爲蠻語

念奴嬌

題東洋學山閣壁

愁塵萬斛看沉埋一帶江山如許太白騎鯨歸采石知道此間

難住大是無聊藥爐丹竈苦把神仙數霍君應笑神仙究竟奚
據見說問月亭邊宵深有鬼猶唱秋墳句鬼也於今零落盡
剩得淒風疾雨我本羈人只宜酣醉否則歸家去長年作客獨
行獨坐何趣問月亭崔刺史世召別業相傳刺史歿後猶能召梨園燕客詳芭川鶴場漫志
滿庭芳

步韻答芭川

二十餘年談經擊劍蒼茫何事人間風流江左家法愧東山獨
自乾坤起舞可憐歲月投閒英雄事千秋有幾懷抱孰能寬
才難可笑吾擔世患世罵吾頑幸生平知己猶未全慳敝帚千
金自享芳蘭一握齊看扶衰手非君誰屬賤子力虛孱

蘇幕遮

月斜時人定後無數離情暗向心頭逗爭奈銷魂花又湊柳似
伊柔梅似伊消瘦枕痕明燈暈透夢到伊行正是眠時候驢
着雲鬢釵欲溜手撥薰籠幾度眉峰皺

滿江紅

久雨欲遊龍湫不得視芭川

雨雨風風二十日淋窗飄瓦卻累我低頭矮屋有詩難寫千里
騎鯨天半去拏雲挽出羲和駕照短筇秀色上吟肩龍湫下
世間語常驚訝心頭願還悲詫擬糟邱放浪連朝達夜萬事無
妨時輩笑一生最苦山靈罵問天台旣入又歸來何爲者

前調

未必無聊有案頭文章一尺被酒後自歌自哭自哀自惜用古
傷今誰足語多愁善病吾之癖喚古人重起九原來纔相識
風月裏稱狂客壇坫上稱詞伯看淋漓滿紙春情秋色只有一
編堪壽世其餘萬事皆陳迹笑牽纏利鎖與名韁終何益

采桑子

當時相送蘼蕪岸水也盈盈淚也盈盈併作空江嗚咽聲至
今舊恨還重疊醒也卿卿夢也卿卿只恐相逢說不清

清平樂

羅衾六幅雙枕屏山曲悄立風前眉暗蹙一點銀燈猶綠水

晶簾下晨粧遠山自愛纖長回首嫣然一笑拈花卻喚檀郎
粧臺起早約畧眉鈎掃六尺玉山嬌欲倒人好影兒尤好不
知那樣憐他雙眸只挂鴉了卻恐微風吹去爲持羅扇橫遮
滿江紅

感梅寄少棠蘇州

如此幽芳飄零向江南江北問何人對花傾倒抱花於邑蜂蝶
自酣桃李夢冰霜獨做江山色況調羹手段尙如斯天應惜
他鄉路誰攀摘故園地甯拋擲嘆橫斜疏影不堪收拾傲骨從
今須少減寒威何意還相逼看花前元鶴羽脩脩爲花泣

金縷曲

庭梅半開獨步花下風過時墜一二片韶華不居零落可感
一半花開矣算人生能幾幾回花前歡醉況復封姨還作劇苦
苦將花吹墜撩起我淒涼心事細雨忠貞祠下過人對花齊滴
傷心淚要花看將何地此花又向天涯棄便無窮幽香冷豔
相憐誰是我也家風稱寶樹頗與花同臭味但有恨花曾知未
當日戴花人似玉想愛花無奈花難寄花應替我憔悴忠貞祠在福州
烏石山有梅一株宋代物也山近爲喚夷所踣
百字令

寄肖巖

右旗左鼓送青青直到黃生門戶門內秋風高一尺門外秋蟲

無數拍案而歌仰天而嘯且作婆婆舞李郎往矣人間誰共辛
苦知否我倦欲眠諸君刺刺果是何言語幸有一樽堪共酌
休論千秋萬古君看任雲忽如雞狗又忽如龍虎回頭究竟蒼
茫都化塵土

旗鼓省城二山名肖巖
有左鼓右旗山人章

喝火令

夢好原無據愁多夜屢醒對人無賴遠山青最是酒闌燈灺小
膽怯淒清河漢三千里更籌二五聲幾番憔悴可憐生爲汝
焚香爲汝寫心經爲汝素來多病減算祝雙星

大江東去

一江春水問東流流否許多離緒十里西風吹客夢魂繞蘼蕪

舊路記否當時歸期須早執手重分付低頭長嘆淚痕只恐人
覷便是鐵石心腸不堪卒讀別恨江郎賦一樹好花開又落
猛想花間笑語儂做花心卿爲花朵並蒂猶無趣天涯那曉多
愁多病多苦

買陂塘

寄星村

意中人幾回入夢李郎憔悴如許世間多少淒涼事難過莫如
兒女天何苦將絕代風流挫折成塵土空牀酸楚剩一領牛衣
無人對泣纔是斷腸處

星村近喪其內子

蟠桃塢

江姬天所居余曾與星村醉其處

我曾對花飛舞餐霞亦有題句

餐霞樓在滄霞洲張姬錦雲素善星村所以事星村者備至今

沒數年矣。星村圖其影爲長卷。余爲題金縷曲一闋。許余睹棋山莊詞話。成千古君應去去。忒利天邊重伴香魂住。英雄無主。想酹酒長江夜裏。知道也要淚如雨。

滿江紅

憶龍湫

知否江山待我輩。消除寂寞。我夜夢山靈無數。牽衣相約有酒。有花人不俗。做風做雨。天真惡。問半間樓下幾株梅。誰堪託。沉沉睡雲邊。鶴淒淒。語梁間。雀喚胸中冷淡。無多邱壑。得意文章甯足恃。縱情歡笑。原非錯。喜今朝初日照羣峯。青如削。摸魚兒

更能有幾多佳日濃陰忽又如許栽花先把看花算最怕妒花
風雨腸斷處便飛上錦茵究竟成塵土花如解語算月淡霜嚴
香魂有恨向我夢中訴重回想到底如花非誤飄零無限人
戲風塵纔有銷魂地留得餘香千古花知否縱銀闕瓊樓也被
頑蟾苦人間還愈看花底可見花開花落日日對花舞
賀新涼

題芭川研劍集

知否淒涼甚將生平許多血淚行間染盡爲問昂藏成底事幾
字區區僅剩算僕與夫君同病消受旁觀譏又笑只自家長抱
傷心證但如此何究竟紛紛擾擾誰時定溯年來所傳消息

令人驚聽便有熱腸堪倚藉熱到如今還靚況未必千秋堪信
作樂一時聊復爾把新詞揮灑終吾興且安曉吾非聖
憶少年

一窗昏月一檠殘燄一牀涼被寄書寫難盡這孤眠滋味終
日沉沉都似醉更昏昏低頭欲睡夢魂常彷彿見箇儂垂淚

金縷曲

讀芑川寄肖巖詞感作

回首茫茫耳嘆有如孤雲一片隨風行止少不如人今又壯世
載辛酸未已幸猶剩昂藏堪喜瘦骨愈磨會愈健但近時漸覺
難提起誰其作我依倚程生昔日言之矣算千秋名人雖好

更須賢子我輩疎狂天或忌未必真能獲此況吾非家駒千里
已負當年鞭策意望後來跨竈驂驅比覓東粟方髻齒
生查子

斜月滿高樓千里長相隔樓下碧桃花又做春風色
羅帶十分寬羅衣無情碧休掃門前塵留看郎行迹

賀新涼

苦熱

欲避真無所拚一身爲伊憔悴天平何補惟有慈雲千萬片救
得人閒焦苦濟甚用亂搗雷鼓勉強出山來又去誤商羊下界
空飛舞能作出幾絲雨
封姨更是癡兒女只微微披花拂柳

怎消狂暑蕩滌山川驅旱魃解愠應如上古更一奏綠章天府
爲遣神龍時布澤看炎威那得狂如虎抱此意將誰語

滿江紅

酒間感懷

不合時宜生這樣肚皮怎好矮簷下更添一付冬烘頭腦飲酒
酣嬉無不至狂言只恐人驚倒問世間誰醉與誰醒曾知道
青青葉花偏稿團團月人將老有一腔熱血自家懷抱對影屢
揮知己淚感恩二字心如擣算當年一飯報千金今難討

蝶戀花

雲際雙鬟餘一抹桃做卿腮柳更如卿髮當日離舟容易發渡

江纔怨江波闊 他鄉況味甯堪說
茗椀藥爐消盡相如渴不
飲心頭常兀兀無情風雨無情月

采桑子

悞儂唱罷燈花小月也彎彎眉也彎彎無數青山是鬢鬟
不知何事頻惆悵醉也艱難醒也艱難自己私情自己瞞

金縷曲

病中放言

瘦到如斯矣更無端三尸作虐累人料理萬感心頭如裹繭自
問差非無恥便多病聽之而已骨折筋懸吾不惜這頭顱還要
時昂起況未必至於此 昨宵夢入天關裏向瑤階叩頭自訴

轍軻何以香案願修清淨福下界從今裏趾帝笑曰所言何鄙
汝看名人多磨折汝生平不合稱才子才未盡偏難死
前調

談藝視芭川

總要性情耳自古來韓蘇李杜所爭止此試把藝文時一閱姓
氏紛紛難紀正法眼何曾有幾風雅本原都不講只描頭畫角
真堪鄙覆醬瓿誰料理 要展精神新壁壘癡泉比雙眸炯炯
驅神役鬼莫笑填詞爲小道第一須刪綺靡如椽筆橫空提起
千古名山原有數這功名不與尋常比深相望子劉子

采桑子

書樂章集後

井華水冷堪鳴咽淡月如弦殘柳如絲零落鶯花七百年淺
則低唱知何意誰寫銀箋誰按絲絃俱奉文章合自憐

金縷曲

芭川外大母許氏夫死守節事姑孝姑死未葬遭火抱柩以
殉芭川有詩記其事屬余以長短句寫之

聽此驚心耳使古來淒涼苦節似茲有幾薩氏之嫠許氏女家
住開元之里那一夜熒煌似矢堂上威姑呼不動痛孱軀難負
棺飛起環而哭但相視 旁人一見俱奔矣看炎光接檐入室
飛騰未已魂魄有知知妾恨妾若偷生更恥算只有區區一死

究竟九原難贖罪恐傷心更累吾夫子真不料至於此
綺羅香

廿九歲初度

已過年華不堪再問又到懸弧之日滿抱幽情曾有幾人能識
別離夢憐我憐卿疎狂態誰嫌誰惜把蒼茫此意問天可堪天
做斷腸碧 詞壇詩城酒國卻亦生平頗頗細思無益十載孤
燈照盡千秋得失問銅柱幾輩銘功看沙場何人裹革算明年
三十非遲投卻班超筆

賭棋山莊集 酒邊詞二終